

四庫全書

集部

欽定四庫全書

集部

游廬山集卷二

詳校官庶吉士臣吳烜

侍讀臣孫球覆勘

總校官進士臣朱鈐

校對官中書臣陳本

膳錄監生臣恭安

欽定四庫全書

集部三

游廬山集

別集類二 宋

提要

臣等謹案游廬山集四卷宋游酢撰酢字定夫建陽人元豐五年進士建中靖國初歷官監察御史宣和初終於知濠州事蹟具宋史道學傳楊時龜山集有酢墓誌銘稱所著有中庸義一卷易說一卷詩二南義一卷論語

孟子雜解各一卷文集十卷年譜稱其年二十九錄明道先生語年四十一錄伊川先生語年四十六作論孟雜解中庸義年四十七作易說詩二南義而不言文集蓋本各為書也此本首以論語雜解中庸義孟子雜解為一卷次易說詩二南義為一卷次師語師訓為一卷次以文七篇詩十三首附以墓誌年譜為一卷又中庸義後有拾遺孟子雜解僅

八條詩二南義僅二條蓋後人掇拾重編不但非其原本且併非完書矣春日山行詩中有風詠舞雩正此日雪飄伊洛是何年之句自用程門立雪故實似亦不類酢作以其為宋儒遺書別無他本姑錄之以備一家焉乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

游鴈山集卷一

宋 游酢 撰

論語雜解

學而時習之章

理也義也人心之所同然也學問之道無他求其心
所同然者而已學而時習之則心之所同然者得矣
此其所以說也故曰理義之說我心猶芻豢之說我

口今試以吾平居之學驗之若時習於禮則外貌無
斯須不莊不敬時習於樂則中心無斯須不和不樂
無斯須不莊不敬則慢易之心無自而入而本心之
敬得矣無斯須不和不樂則鄙詐之心無自而入而
本心之和得矣時習之則時有得矣時有得矣其為
說可勝計哉流水之為物也不盈科不行君子之志
於道也不成章不達故積於中者厚然後發於外者
廣得於己者全然後信於人者周有朋自遠方來

則發於外者既已廣信於人者既已周矣非夫積厚
於中得全於己者曷至是哉此其所以樂也孟子曰
令聞廣譽施於身所以不願人之文繡也夫聞譽施
諸身則美在其中而暢於四支夫豈借美於外哉惟
不借美於外則志願在我而世之所可願者屏焉其
為樂也烏可已耶蓋君子非樂於朋來也樂其聞譽
有以致之也非樂其聞譽也樂其美在其中而暢於
四支有以致聞譽也然求為可樂者亦反諸身而已

矣不知命無以為君子也蓋不知命則行險以徼幸
將無所不至其趨於小人也孰禦焉尚何以為君子
乎若夫尊德樂義之士囂囂自得不怨天不尤人邈
世無悶不見是而無悶非君子成德孰能至於是哉
故曰人不知而不愠不亦君子乎語成德也不然不
念舊惡怨是用希與夫遺佚而不怨阨窮而不憫者
何以稱夷惠說也樂也君子也言其義則然若夫所
以說樂所以為君子則在於學者之心得譬之飲食

之美也借使易牙日饗於前而已不預饗焉終不足
以知味 又曰時習於禮則外貌無斯須不莊不
敬時習於樂則中心無斯須不和不樂且將日進於
理義之地矣故說內足以成己外足以成物君子所
謂三樂者內外兩得矣故樂學而至於樂則在我者
無憾矣宜其令聞廣譽四馳也而人有不知焉是有
命也不知命無以為君子也今也人不知而不愠則
非成德之士安於義命者不能爾也謂之君子

其爲人也孝弟章

事親孝故忠可移於君事兄弟故順可移於長孝弟
者忠順之資也其不足於忠順者寡矣故孝弟之人
鮮好犯上至於不好犯上則忠順足於已而悖逆之
氣不萌於中矣若是者其事君必如其親憂國必如
其家愛民必如其子固足以禦亂矣曾何作亂之有
故曰不好犯上而好作亂者未之有也木漸於上水
漸於下有本者如是故君子之道亦務本而已矣孝

弟也者置之而塞乎天地溥之而橫乎四海仁此者
為仁履此者為禮宜此者為義信此者為信順此者
為樂茲非仁之本與知孝弟為仁之本則本立而道
生之說見矣

巧言令色章

仁者誠而已矣無偽也何有於巧言仁者敬而已矣
無諂也何有於令色巧言入於偽令色歸於諂其資
與木訥反矣宜其鮮於仁也使斯人之志在於巧言

令色而已則孔子所謂朽木糞墻孟子所謂鄉原終不可以入德使其人之志在於善而失其所習則猶可以自反此聖人所以不絕其為仁而止言其鮮也然則仲尼之惡令色也如此而詩人以美仲山甫何也蓋詩人之所謂令色者與仲尼之意異善觀詩者以意逆志可也

吾日三省吾身章

考曾子之學主於誠身則其操心宜無不忠其立行

宜無不信而處已者無憾矣慮其所以接人者或入於不忠不信而不自悟也故曰三省其身焉省之如此其周則有不善未嘗不知知之未嘗復行者庶乎可以企及矣然此特曾子之省身者而已若夫學者之所省又不止此事親有不足於孝事長有不足於敬歟行或愧於心而言或浮於行歟愆有所未窒而忿有所未懲歟推是類而日省之則曾子之誠身庶乎可以跂及矣古之人所謂夜以計過無憾而後即

安者亦曾子之意曾子於正心誠意之道宜無須臾
忘也惟以應物之際恐或失念而違仁故日所省者
三事而已

道千乘之國章

道之為言未及治也猶書所謂引養引恬而已馬融
謂為之政教者近之矣敬事而信德教以道之也節
用而愛人使民以時政事以道之也有德教以道之
則尊君親上之心篤有政事以道之則勸功樂事之

意純有國之道何以加此蓋惟敬朝覲之事則君臣
嚴敬冠昏之事則男女別敬喪紀之事則民知哀死
而慎終敬祭祀之事則民知報本而追遠事之所在
無所不用其敬焉則民孰有不敬者哉一號令之出
也一期會之時也一賞罰之用也一嚔笑之形也無
所不用其信焉則民其有不信者哉由是道而誠於
心則有虞氏未施信於民而民信之夏后氏未施敬
於民而民敬之者亦久於斯道而已雖然知敬事而

已未及乎信則慢令而致期非所以孚民知信而已
未及乎節用則侈費而傷財非所以裕國知節用而
已未及於愛人則將吝細而少恩非所以厚下知愛
人而已不知使民以時則將輕用其力輕奪其務非
所以養民知是五者而法度加焉則治人之道足矣
當孔子時斯道也將亡矣故亟言之使道之以道則
於法度乎何有

弟子入則孝章

入孝而出弟行謹而言信處衆而汎愛交友而親仁
君子之務此其本也有所未能則勉為之有所未至
則力致之待其有餘也然後從事於文則其文足以
增美質矣猶木之有本根也然後枝葉為之庇覆苟
其無本則枝葉安所附哉夫文者詩書禮樂之謂也
詩者言此情而已書者述此事而已禮者體此而已
樂者樂此而已使其孝不稱於宗族其弟不稱於鄉
黨交遊不稱其信醜夷不稱其和仁賢不稱其智則

其文適足以滅質其博適足以溺心以為禽犢者有之以資發塚者有之託真以酬偽飾姦言以濟利心者徃徃而是也然則無本而學文蓋不若無文之愈也是以聖人必待行有餘力然後許之以學文不然固有所未暇也後之君子稍涉文義則沾沾自喜謂天下之美盡在於是或訾其無行則驚然不顧或詆其不足則忿疾如深讐亦可謂失羞惡之心矣烏知聖人之本末哉

賢賢易色章

天下之達道五君臣也父子也夫婦也昆弟也朋友之交也先王之時在上者舍是無以教在下者舍是無以學故孟子曰學則三代共之皆所以明人倫也今能賢賢易色事父母能竭其力事君能致其身與朋友交言而有信則其於人倫厚矣學之為道何以加此雖曰未學吾必謂之學矣仲尼之門子夏以文學名而其言如此則知古之所謂學者在本而不在

末故學而一篇大抵皆在於務本

君子不重章

正其衣冠尊其瞻視儼然人望而畏之此君子之重而威也重而威則德性尊矣故君子日就小人日遠由是而學其思之必精其行之必篤其問之必周其聽之必專入乎耳著乎心此德全而學固矣反是則言招憂行招辱貌招淫好招辜何威之有道聽而塗說者有之一心以為有鴻鵠將至者有之何固之有

忠信所以進德也如甘之受和白之受采故善學者
其心以忠信為主不言則已言而必忠信也故其言
為德言不行則已行而必忠信也故其行為德行止
而思動而為無時而不在是焉則安往而非進德哉
故為仁不主於忠信則仁必出於姑息為義不主於
忠信則義必出於矯抗操是心以往則禮必出於足
恭智必出於行險安往而非敗德哉而何進德之有
焉譬之欲立數仞之墻而浮埃聚沫以為基亦沒世

不能立矣故主忠信者學者之要言也孟子之論尚友也以一鄉之善士為未足而求之一國以一國之善士為未足而求之天下以天下之善士為未足而求之古人無友不如己者尚友之道也求得賢者尚而友之則聞其所未聞見其所未見而德日起矣此仲尼所以期子夏之日進也孔子曰過而能改善莫大焉蓋能改一言之過則一言善矣能改一行之過則一行善矣若過而每不憚改者其為善可勝計哉

然則君子之道以威重為實而以學成之學之道必
以忠信為主而以勝已者輔之雖然使其或吝於改
過則賢者未必樂告以善道故以過則勿憚改為終焉
慎終追遠章

終者人所易忽也而慎之遠者人所易忘也而追之
厚之道也

父在觀其志章

三年無改於父之道若堯舜文武之道雖行萬世不

可改也何止三年若武帝權酤之政德宗宮市之事
昭帝順宗不踰年而改之天下後世不以為非者何
待三年今言無改於父之道則在所當改而可以未
改也人君士大夫皆當如此居喪之制有不言而事
行者有言而後事行者有身自執事而後行者此尊
卑之等也如以為聽於冢宰為嫌於改父之道則孔
子所謂古之人皆然者豈為其父皆有可改之道乎
盖闕恤之道當然

君子不器章

形而上者謂之道形而下者謂之器君子體夫道者也故不器不器則能圓能方能柔能剛非執方者所與也

學而不思章

多識前言往行而考古以驗今者學也耳目不交於物而悉心以自求者思也思則知敬以直內而中有主學則知義以方外而外有主學而不思則所學者

不能以為已故罔罔者反求諸已而無實也思而不學則所思者不足以涉事故殆殆者應於事而不安也

子張學干祿章

行於已而為行故慎行則寡悔悔在心也應於物而有言故慎言則寡尤尤在事也易之言無悔者本諸心也故於行已者言寡悔言無尤者涉於事也故於應物者言寡尤咸同人復大壯無悔賁鼎蹇旅大畜

無尤非謂言可以有悔也

人而無信章

人而無信以輓軌為喻何也曰忠信所以進德而義也禮也以信成之人而無信則中無所主矣以之為仁則蹉蹉而已以之為義則跲跲而已為智則誣為禮則偽無所施而可也輓軌大車小車所恃以行者也而有信則大德小德所資以進也故輪輿雖備而無輓軌則有車之名而無運行之實人而無信則雖

居之似忠信行之似廉潔終不可入堯舜之道故其喻如此

孔子謂季氏章

人臣僭國君之禮是無君也陪臣僭天子之禮是無王也季氏以八佾舞其心遂無王矣是將拔本塞源冠履倒施滅天理而壞人倫矣此而可忍孰不可忍也

人而不仁章

人而不仁則人心亡矣以事父必不孝其如父子之
禮何以事君必不忠其如君臣之禮何在宗廟之中
上下同聽之而和敬彼且不敬其如宗廟之樂何在
族黨之中長幼同聽之而和順彼且不順其如族黨
之樂何是其為禮也必偽而慢易之心入之矣豈足
以治躬其為樂必淫而鄙詐之心入之矣豈足以治
心

或問禘之說章

祭祀之義非精義不足以究其說非體道不足以致其義蓋惟聖人為能饗帝為其盡人道而與帝同德惟孝子為能饗親為其盡子道而與親同心也仁孝之至通乎神明而神祇祖考安樂之則於郊社之禮禘嘗之義始可以言明矣夫如是則於為天下國家也何有宜乎衆人所不得聞也故或問禘之說孔子答之曰不知也其曰知其說者之於天下其如示諸斯乎指其掌則又以明其不可不知也是禮也中庸

兼郊社禘嘗言之其說亦當如此古人之所謂通乎
一萬事畢也論語特因或人之問而發之故止及禘
之說耳成王自謂予冲子夙夜旰祀蓋雖在宮肅
肅在廟者文王純德之容而曾孫篤之所以致太平
也若言禘大禮其義衆恐非其質也恐與中庸意異
關雎樂而不淫章

常情之哀樂皆出於私意故其樂必淫於己其哀必
傷於人關雎之樂在於得淑女則異乎人之樂也故

不淫其色其哀在於思賢才則異乎人之哀也故無
傷善之心先王之用心憂樂以天下而已故太姒所
以宜為文王之配

子謂韶盡美矣章

王者功成作樂韶武之盡美以其功言之也如觀其
成功則二聖人之樂皆無餘美乃若所遇之事所以
致功者舜以紹堯而為韶武以滅商而為武豈可同
日而語哉觀成湯之有慚德則武之用心可知矣故

盡美者其功也未盡善者其事也猶之周公東征四國是皇是時周室幾再造矣其功顧不大哉至於致辟管叔於商豈其所欲乎武之未盡善其事類如此矣

惟仁者能好人章

好善而惡惡天下之同情也然好惡每失其實者心有所繫而不能克己也惟仁者宅心於大中至正之地而無私焉故好惡非我尊王之道路而已知及之

仁或未足以守之則不足以與此故言唯仁者為能
富與貴章

富與貴非其道得之則君子不處以有義也君子宜
富貴者也今至於貧賤是不以其道得之也然而不
去者以有命也此皆為君子言之故主彌子瑕而得
卿孔子不為也 又曰君子去仁則君非君子非子
矣安所成其名 又曰無終食之間違仁言造次顛
沛必依於仁雖終食之頃不違也如以飲食必有祭

則僧家出生皆可以為不違仁矣可驗其學不在已
參乎吾道一以貫之章

夫道一而已矣天地一指也萬物一馬也無往而非
一此至人所以無已豈參彼已所能預哉此忠恕所
以違道為其未能一以貫之也雖然忠所以盡已恕
所以盡物則欲求人道者宜莫近於此此忠恕所以
違道不遠也子曰參乎吾道一以貫之曾子曰唯使
曾子之知不足以及此則仲尼不以告而曾子不自

誣今日忠恕而已者所以告門人也孟子曰萬物皆
備於我矣反身而誠樂莫大焉此仲尼告曾子之道
也強恕而行求仁莫近焉此曾子告門人之道也然
則曾子豈有隱於是耶蓋門人智不足以及此而強
告之適足以滋其惑使門人誠於忠恕則於一道亦
何遠之有子曰吾與回言終日不違如愚又曰語之
而不惰又曰於吾言無所不說則其師資之際朝夕
相與言而默契於道者宜不少矣而論語所載止於

問為仁問為邦而已則其所不載者皆二三子所得聞也由此觀之則仲尼曾子所以授受者門人所得聞而所以告門人者不過忠恕而已此曾子所以為善學而善教者也

夫子之文章章

孟子曰仁之於父子義之於君臣至聖之於天道命也有性焉君子不謂命也論性之妙而與於天道雖聖人有所不能知焉況子貢乎聞即是知可得而聞

者可以與知之謂也不可得而聞者亦有所不能知之謂也

顏淵季路侍章

孔子之道修於家行於鄉施於國達於天下亦不過使老者安之朋友信之少者懷之而已蓋使天下之為子者皆致其孝然後老者莫不安之矣使天下之為父者皆致其慈然後少者莫不懷之矣使天下之為朋友者皆先施之然後朋友莫不信之矣此所以

為孔子之志其辭雖若自抑而非盛德之善治於人心者亦不足以與此

仲弓問子桑伯子節

子桑伯子之可也以其簡若主之以敬而行之則簡為善

哀公問弟子章

不遷怒者怒適其可而止無溢怒之氣也傳所謂室於怒而市於色者遷其怒之甚者也不遷怒則發而

中節矣喜怒哀樂不可無也每思要發皆中節之為難耳文武一怒而安天下之民則何惡於怒哉記曰心有所忿懣則不得其正今至於不遷怒則於正心之學可謂自強矣不貳過者一念少差而覺之早不復見之行事也蓋惟聖人能寂然不動故無過顏子能非禮勿動而已故或有不善始萌於中而不及復行是其過在心而行不貳焉則於修身之學可謂自強矣正心以修身自強而不怠此孔子所謂好學而顏

子所以三月不違仁也若夫絕學者則心無所於正身無所於修暖然似春淒然似秋天德而已矣此聖賢之辨也

子華使於齊章

餽廩稱事所以食功也今原思之為宰而辭祿不受則食功之義廢矣蓋義所當得則雖萬鍾不害其為廉借使有餘猶可以及鄰里鄉黨蓋鄰里鄉黨有相賙之義

回也其心三月不違仁章

仁人心也不可須臾離也猶飢之於食渴之於飲一日闕之則必顛仆餓踣而殞命矣人心一日不依於仁則不足以為人焉仲尼嘗歎曰有能一日用其力於仁矣乎當時之人不能一日用其力於行仁又安得以仁存心三月之久如顏子哉違者對依而言之

不違則心常依於仁矣

賢哉回也章

非樂簞瓢陋巷也不以貧窶動其心改其樂也知其
所樂則知其不改

人之生也直章

直者循理之謂也惟其循理故能盡生之經與直養
之直同至於姦罔則去直也遠矣

知者樂水章

仁者安仁得於所性之妙不逐末以忘本不逐偽以
喪真不殘生以傷性可以保身可以養生可以盡年

故享年享國皆可長久若堯舜文王皆度越百歲是也

齊一變章

齊雖强大經威公一變而為霸則王道不復存焉魯雖削弱而周公之法則猶在有王者作取法於魯則文武之道翕然丕變矣

志於道章

志於道者念念不忘於道也念念不忘則將有以宅

心矣宅心於道者無思也惟精也無為也惟一也惟精則無偏此道之大中惟一則無變此道之大常堯授舜舜授禹至於允執厥中則志於道之效也據於德者止其所而自得也自得於己無待於外則有以勝物而其固萬物莫足以傾之獨立不懼而其守舉世莫得以易之則所據之地可謂之闕且久矣孟子所謂富貴不能淫貧賤不能移威武不能屈則據於德之效也據於德所以體道也依於仁出入起居視

聽食息無時而違仁也仁者人也人之成位乎天地之間以其仁而已不然則皇皇然無所依矣猶之父者子之天也而子依之夫者妻之天也而妻依之不得而違也君子依乎中庸亦若是而已為中庸之不可須臾離也依者違之反也顏子三月不違仁則依於仁之效也依於仁所以成德也義宜此者也禮體此者也智知此者也故曰人而不仁如禮何人而不仁如樂何是故君子依於仁而足矣非謂倚一偏也

孰謂三月不違仁而又不足於義乎道者天也故言
志德者地也故言據仁者人也故言依至於游於藝
則所以閑邪也蓋士志於道苟未至於縱心則必有
息游之學焉傳曰張而不弛文武不能也不有博奕
者乎為之猶賢乎已夫博奕固惡矣而其惡止於博
奕若飽食終日無所用心則心之放逸熱焦火而寒
凝冰何所不至哉是以聖人寧取於博奕也况六藝
之正乎故游於禮所以防其躁也游於樂所以導其和

也游於射所以正內志而直外體也御也書也數也
亦若是而已是皆操心之術也先王之時自幼子常
示母誨六歲學方名十年學幼儀十三舞勺成童舞象
以至於灑掃應對進退無非學者庸詎知大人不失
赤子之心不緣是而得乎故游於藝所以守仁也本
末內外交進而不遺則於宅心而執厥中亦何患於
弗克哉

子不語章

夫子語治而不語亂何也君子樂道人之善惡稱人之惡則語治而不語亂者聖人之仁也且語治而已則是非美惡較然明矣何必語亂而後可以為戒

二三子以我為隱乎章

聖人語默動靜無非教者其所以與二三子者甚易知而易見也惟其聽之者自不能見則以為有隱耳其曰是丘也者質諸已以實其言也故曰天何言哉四時行焉百物生焉聖人亦天而已矣子貢曰夫子

之言性與天道不可得而聞也是性與天道仲尼固嘗言之曷嘗有甚高不可測之論大而無當不近人情乎蓋亦不離於文章也而學者自不能以心契則或疑其未嘗言耳子貢既聞道矣故知夫子之未嘗不言也子路問事鬼神子曰未能事人焉能事鬼敢問死曰未知生焉知死蓋能盡人之道則於事鬼神之道可以不學而能也能知生之說則於死之說可不問而知也告人之道於是乎盡孰謂夫子有隱於由

乎

興於詩章

興於詩言學詩者可以感發於善心也如觀天保之詩則君臣之義修矣觀常棣之詩則兄弟之愛篤矣觀伐木之詩則朋友之交親矣觀關雎鵲巢之風則夫婦之經正矣昔王褒有至性而弟子至於廢講蓼莪則詩之興發善心於此可見矣而以致其言之文為興於詩則所求於詩者外矣非所謂可以興也然

則不學詩無以言何也蓋詩之情出於溫柔敦厚而
其言如之言者心聲也不得其心斯不得於言矣仲
尼之教伯魚固將使之興於詩而得詩人之志也得
其心斯得其所言而出言有章矣豈徒攷其文而
已哉詩之為言發乎情也其持心也厚其望人也輕
其辭婉其氣平所謂入人也深其要歸必止乎禮義
有君臣之義焉有父子之倫焉和樂而不淫怨誹而
不亂所謂發言為詩故可以化天下而師後世學者

苟得其用心何患其不能言哉 又曰明乎齊之音
者有勇明乎商之音者有義亦感發之意 又曰詩
之文盖有後世老師宿儒所不能為曾謂始學者而
能之乎

民可使由之章

夫先王豈以其術智籠天下之民而愚之哉盖道無
方也反而觀之則無已泛而觀之則無物虎豹得之
而猛噬蛇虺得之而毒螫厚者見之而為仁薄者見

全宋文卷一百一十一
卷一
之而為惡觀老子之學變而為申韓則民不可使知
之理可見矣蓋其氣質或不良而竊窺其端倪則適
足以逞其不肖之心而已此小人之童觀所以无咎
也

吾自衛反魯章

雅頌各得其所而不及禮與風何也曰有其德無其
位不敢作禮樂焉則禮樂非孔子之事所謂雅頌各
得其所者因其舊而正之非有所作也故不及禮闕

睢之亂師摯固嘗治之矣故不及風

語之而不惰者章

上士聞道勤而行之回於夫子之言無所不說非不惰而何

顏淵問仁章

孟子曰仁人心也則仁之為言得其本心而已心之本體則喜怒哀樂之未發者是也惟其徇己之私則汨於忿慾而人道熄矣誠能勝人心之私以還道心

之公則將視人如己視物如人而心之本體見矣自此而親親自此而仁民自此而愛物皆其本心隨物而見者然也故曰克己復禮為仁禮者性之中也且心之本體一而已矣非事事而為之物物而愛之又非積日累月而後可至也一日反本復常則萬物一體無適而非仁矣故曰一日克己復禮天下歸仁焉天下歸仁取足於身而已非有藉於外也故曰為仁由己而由人乎哉顏淵請事斯語至於非禮勿動則

不離於中其誠不息而可久矣故能三月不違仁雖然三月不違者其心猶有所操也至於中心安仁則縱目之所視更無亂色縱耳之所聽更無姦聲無思也無為也寂然不動感而遂通天下之故則發育萬物彌綸天地而何克已復禮三月不違之足言哉此聖人之能事而對時育萬物者所以博施濟衆也仁至於此則仲尼所不敢居而且罕言也然則仁與聖烏乎辨曰仁人心也操之則為賢縱之則為聖苟

未至於縱心則於博施濟衆未能無數數然也

仲弓問仁章

出門如見大賓使民如承大祭則以閑邪存其誠而已出門如見大賓則無時而不敬也使民如承大祭則無事而不敬也仲弓能請事斯語則於非禮勿動亦庶幾焉

司馬牛問仁章

仁之難成久矣豈惟行之為難知之固未易也今欲

言出而當於仁得無難乎故曰其言也詎詎之難也
夫子答樊遲之間仁曰先難而後獲答司馬牛曰仁
者其言也詎皆未可與言仁故也

吾之於人也章

大公至正之道古今所共由也合乎此則為是外乎
此則為非其所謂是者非惟聖人之所是天下亦以
為是而好之其所謂非者非惟聖人之所非天下亦
以為非而惡之聖人因民心之是非好惡還以治之

非故矯揉其性而為不可順從之事也三代之君所以治者如此孔子亦出乎大公至正之道而已

唯上知與下愚不移章

孔子之言性有以其本言之者若繼之者善成之者性是也有以人所見言之者若性相近習相遠是也孟子亦然其道性善深探其本也其曰孺子將入井皆有怵惕惻隱之心乃若其情則可以為善矣姑據人所見而語之也是以當時學者不能無疑夫道未

始有名感於物而出則善之名立矣託於物而生則性之名立矣善者性之德故莊子曰物得以生謂之德性者善之資也故莊子曰形體保神謂之性蓋道之在天地則播五行於四時百物生焉無非善者也無惡也故曰繼之者善也道之在人則出作而入息渴飲而飢食無非性者也無妄也苟得其性之本然反身而誠則天地萬物之理得而道自我成矣故曰成之者性也惟其同出於一氣而氣之所值有全有偏有

邪有正有粹有駁有厚有薄然後有上智下愚中
人之不同也猶之大塊噫氣其名為風風之所出無
異氣也而叱者吸者叫者號者其聲若是不同以其
所託者物物殊形耳其聲之不同而謂有異風可乎
孟子謂性善正類此也荀卿言性惡揚雄言人之性
善惡混韓愈言性有三品蓋皆蔽於末流而不知其
本也觀五方之民剛柔輕重遲速異齊則氣之所稟
可以類推之也以堯為君而有丹朱以瞽瞍為父而

有舜又何足疑乎孔子言性相近者以習而相遠則天下之性或相倍蓰者固多矣由是觀之則謂性有三品未為不可唯其止以是為性則三子者之失也成性存存道義之門蓋非盡心知性者不足以與此宜乎夫子之言性門人莫得而聞也子貢知道者也

得其所以言矣故其贊聖人者及此

子之武城章

子夏以灑掃應對進退教人子游以弦歌為學知此

然後知古人為學之方惟賢者得其大者不賢者得其小者故有愛人易使之異

微子去之章

董子曰仁人者正其誼不謀其利明其道不計其功善乎其言始可與言仁也已矣蓋仁人之用心惟仁所在而已仁之所在則從之不論所以也仁在於去則去之而不愧微子是也仁在於不去則為之奴而不辱箕子是也仁在於死則就死而不悔比干是也

豈顧利害禍福而易其求仁之志哉故伯夷之清伊
尹之任柳下惠之和皆仁也伯夷辭為孤竹之君而
餓於首陽之下由衆人觀之其利害固殊絕也而彼
獨以是求仁焉以是求之以是得之既以遂其志矣
夫何怨之有宰我曰仁者雖告之曰井有仁焉其從
之也宰我之意蓋曰仁者之志惟求仁而已功利非
所計也井者必死之地也厥或告之曰死地有仁彼
其用心之誠亦將從之也是不然君子之求仁亦曰

循理而已矣夫理之所不載安在其為仁耶故可逝者其心也其不可陷者其理也以其用心之仁故可以欺以其見理之明故不可罔以并為言則犯害之地皆是也

堯曰咨爾舜章

有一言而足以盡至治之要曰中而已蓋中者天下之大本也豈執一云乎哉不偏不倚適當其可而已譬之權衡之應物曾無心於輕重抑揚高下稱物平施

無銖兩之差此其所以為時中也與堯舜禹三聖授受之際所守者一道允執厥中乃傳心之密旨也

中庸義

天命之謂性節

惟皇上帝降衷於下民則天命也若遁天背情則非性矣天之所以命萬物者道也而性者具道以生也因其性之固然而無容私焉則道在我矣夫道不可擅而有也固將與天下共之故修禮以示之中修樂

以導之和此修道之謂教也或蔽於天或蔽於人為我至於無君兼愛至於無父則非教矣知天命之謂性則孟子性善之說可見矣或曰性惡或曰善惡混或曰有三品皆非知天命者也

君子中庸章

道之體無偏而其用則通而不窮無偏中也不窮庸也以性情言之則為中和以德行言之則為中庸其實一道也君子者道中庸之實也小人則竊中庸之

名而實背之是中庸之賊也故曰反中庸

道之不行也章

知出於知性然後可與有行知者過之非知性也故
知之過而行之不至也已則不行其能行於天下乎
若鄒衍之談天公孫龍之詭辨是知之過也愚者又
不足以與此此道之所以不行也行出於循理然後
可與有明賢者過之非循理也故行之過而知之不
至也已則不知其能明於天下乎若楊氏為我墨氏

兼愛是行之過也不肖者又不足以與此此道之所
以不明也道不違物存乎人者日用而不知耳故以
飲食況之飲食而知味非自外得也亦反諸身以自
得之而已夫行道必自致知始使知道如知味斯道
其憂不行乎今也鮮能知味此道之所以不行也
回之爲人也章

道之不行知者過之如舜之知則道之所以行也道
之不明賢者過之如回之賢則道之所以明也又

曰擇乎中庸見善明也得一善則服膺不失用心剛也

子路問強章

中庸之道造次顛沛之不可違惟自強不息者為能守之故以子路問強次顏淵

君子之道四節

有所不足不敢不勉將以踐言也則其行顧言矣有餘不敢盡耻躬之不逮也則其言顧行矣言行相顧

則於心無餒故曰胡不慥慥爾慥慥心之實也

君子素其位而行章

素其位而行者即其位而道行乎其中若其素然也
舜之飯糗茹草若將終身此非素貧賤而道行乎貧
賤不能然也及其為天子被袵衣鼓琴若固有之此
非素富貴而道行乎富貴不能然也飯糗袵衣其位
雖不同而此道之行一也至於夷狄患難亦若此而
已道無不行則無入而不自得矣蓋道之在天下不

以易世而有存亡故無古今則君子之行道不以易
地而有加損故無得喪至於在上位不陵下知富貴
之非泰也在下位不援上知貧賤之非約也此惟正
已而不求於人者能之故能上不怨天下不尤人蓋
君子為能循理故居易以俟命居易未必不得也故
窮通皆好小人反是故行險以徼幸行險未必常得
也故窮通皆醜學者要當篤信而已射有似乎君子
者射者發而不中則必反而求其不中之因意者志

未正邪體未直邪持弓矢而未審固邪然而不中者
寡矣君子之正身亦若此也愛人不親反其仁治人
不治反其智禮人不答反其敬行有不得者皆反求
諸已而已而何怨天尤人之有哉失諸正鵠者行有
不得之況也

舜其大孝也與章

中庸以人倫為主故以孝德言之

無憂者章

武王之事非聖人所欲為也故曰壹戎衣而有天下
身不失天下之顯名謂之不失則與必得異矣乃如
其道則尊為天子富有四海之內宗廟享之子孫保
之與舜未始不同也 又曰武王於泰誓三篇稱文
王為文考至武成而柴望然後稱文考為文王仍稱
其祖為太王王季然則周公追王太王王季者乃文
王之德武王之志也故曰成文武之德不言文王者
武王既追王矣武王既追王而不及太王王季以其

未受命而其序有未暇也禮記大傳載牧野之箕追
王太王亶父王季歷文王昌亦據武成之書以明追
王之意出於武王也世之說者因中庸無追王文王
之文遂以謂文王自稱王豈未嘗考泰誓武成之書
乎君臣之分猶天尊地卑紂未可去而文王稱王是
二天子也服事商之道固如是耶書所謂九年大統
未集者後世以虞芮質厥成為文王受命之始故也
當六國時秦固以長雄天下而周之位號微矣卒垣

衍欲帝秦魯仲連以片言折之衍不敢復出口蓋名
分之嚴如此故以曹操之英雄逡巡於獻帝之末而
不得逞彼蓋知利害之實也曾謂至德如文王一言
一動順帝之則而反盜虛名而拂天理乎且武王觀
政於商而須假之五年非偽為也使紂一日有悛心
則武王當與天下共尊之必無牧野之事然則文王
已稱之名將安所歸乎此天下之大戒故不得不辨
亦所以正人心也

武王周公其達孝矣乎章

大孝聖人之絕德也達孝天下之通道也要其為人
倫之至則一也故繼志述事之末亦曰孝之至也事
死如事生以慎終者言之事亡如事存以追遠者言
之故始死謂之死既葬則曰反而亡焉此死亡之辨
也惟聖人為能饗帝孝子為能饗親饗帝一德也饗
親一心也要不過乎物而已其於慶賞刑威乎何有
故曰明乎郊社之禮禘嘗之義治國其如示諸掌乎

成王自謂予冲子夙夜毖祀此迂衡之要道也

哀公問政至不可以不知天節

螟蛉有可化之質螺贏有能化之材知是說然後可與言政也然則政之所託可非其人乎故曰為政在人人固未知若規矩準繩在我則方圓曲直無所逃矣故曰取人以身規矩準繩無他人道而已故修身以道修道以仁又曰失其身而能事其親吾未之聞矣故修身然後能事親至於能事親則修身之至

也故曰思修身不可以不事親知事親則德之本立矣而不知人則上而事君下而取友去就從違莫知所向而貽其親之憂者有矣蓋取人以身不能事親安所取人哉其序由事親然後能知人至於能知人則事親之至也故曰思事親不可以不知人

好學近乎知節

知者不惑仁者不憂勇者不懼此成德也孔子自謂我無能焉夫成德豈易得乎能知好學力行知恥則

可以入德矣

齊明盛服

至

所以行之者一也節

齊明所以一其志盛服所以修其容非禮勿動則內無逸德外無過行內外進矣則富貴不能淫貧賤不能移故修身則道立去讒則任之專遠色則好之篤賤貨則義利分貴德則真偽核夫如是則見善明用心剛矣故尊賢則不惑尊其位所以貴之重其祿所以富之同其好以致其利同其惡以去其害則禮備

而情親諸父昆弟所以望乎我者足矣故親親則不
怨 又曰人情莫不欲逸也時使之而使有餘力莫
不欲富也薄歛之而使有餘財則予庶民之道也故
百姓勸日省月試以程其能餼稟稱事以償其勞則
惰者勉而勤者悅矣此來百工之道也故財用足送
往迎來以厚其禮嘉善而矜不能以致吾仁待之者
甚周責之者甚約此柔遠人之道也故四方歸之繼
絕世則賢者之類無不悅舉廢國則功臣之後無不

動亂者懼焉危者怙焉其來也節以時其往也遣以禮則懷諸侯之道也夫如是則德之所施者博而威之所制者廣矣故天下畏之經雖有九而所以行之一者誠而已不誠則九經為虛文是無物也

凡事豫則立節

豫者前定之謂也惟至誠為能定惟前定為能應故以言則必行以事則必成以行則無悔以道則無方誠定之效如此故繼九經言之

在下位節

欲誠其意先致其知故不明乎善不誠乎身矣學至於誠身安往而不致其極哉以內則順乎親以外則信乎友以上則可以得君以下則可以得民此舜之允塞所以五典克從也

唯天下至誠為能盡其性章

萬物皆備於我矣反身而誠樂莫大焉故惟天下至誠為能盡其性千萬人之性一己之性是也故能盡

其性則能盡人之性萬物之性一人之性是也故能
盡人之性則能盡物之性同焉皆得者各安其常則盡
人之性也羣然皆生者各得其理則盡物之性也至
於盡物之性則和氣充塞故可以贊天地之化育夫
如是則天覆地載教化各任其職而成位乎其中矣
其次致曲章

誠者不思不勉直心而徑行也其次則臨言而必思
不敢縱言也臨行而必擇不敢徑行也故曰致曲曲

折而反諸心也擬議之間鄙詐不萌而忠信立矣故
曲能有誠有諸中必形諸外故誠則形形於身必著
於物故形則著誠至於著則內外洞徹清明在躬故
著則明明則有以動衆故明則動動則有以易俗故
動則變變則革汚以為清革暴以為良然猶有迹也
化則其迹泯矣日用飲食而已至於化則神之所為
也非天下之至誠孰能與於此

誠者自成也節

誠者非有成之者自成而已其道非有道之者自道而已自成自道猶言自本自根也以性言之為誠以理言之為道其實一也

故至誠無息章

博厚而不久則載物之德隳矣高明而不久則覆物之道缺矣是則悠久者天地所以成終始也故所以成物

大哉聖人之道章

發育萬物峻極於天至道之功也禮儀三百威儀三千至道之具也洋洋乎言上際於天下蟠於地也優優大哉言動容周旋中禮也夫以三百三千之多儀非天下至誠孰能從容而盡中哉故曰待其人而後行蓋盛德之至者人也故曰苟不至德至道不凝焉至德非他至誠而已矣又曰懲忿窒慾閑邪存誠此尊德性也非學以聚之問以辨之則擇善不明矣故繼之以道問學尊德性而道問學然後能致廣大

尊其所聞行其所知充其德性之體使無不該徧此致廣大也非盡精微則無以極深而研幾也故繼之以盡精微致廣大而盡精微然後能極高明始也未離乎方今則無方矣始也未離乎體今則無體矣離形去智廓然大通此極高明也非道中庸則無踐履可據之地不幾於蕩而無執乎故繼之以道中庸高明者中庸之至理而中庸者高明之實德也其實非兩體也

仲尼祖述堯舜章

中庸之道至仲尼而集大成故此書之末以仲尼明之道著於堯舜故祖述焉法詳於文武故憲章焉體元而亨利物而正一喜一怒通於四時夫是之謂律天時修其教不易其俗齊其政不易其宜使五方之民各安其常各踐其性夫是之謂襲水土上律天時則天道之至正合下襲水土則地理之異宜全矣故博厚配地無不持載高明配天無不覆幬變通如四

時之錯行照臨如日月之代明小以成小大以成大
動者植者皆裕如也是謂並育而不相害或進或止
或久或速無可無不可是謂並行而不相悖動以利
物者智也故曰小德川流靜以裕物者仁也故曰大
德敦化言川流則知敦化者仁之體言敦化則知川流
者智之用

唯天下至聖二章

自惟天下至聖以下聰明睿智聖德也寬裕溫柔仁德也

發強剛毅義德也齊莊中正禮德也文理密察智德也溥博者其大無外淵泉者其深不測或容以為仁或執以為義或敬以為禮或別以為智惟其時而已此所謂時出之也夫然故外有以正天下之觀內有以通天下之志是以見而民敬言而民信行而民悅自西自東自南自北莫不心悅而誠服此至聖之德也天下之大經五品之民彛也凡為天下之常道皆可名為經而民彛為大經經綸者因性循理而治之無汨

其序之謂也立天下之大本者建中於民也淵淵其
淵非特如淵而已浩浩其天非特如天而已此至誠
之道也德者其用也有目者所共見有心者所共知
故凡有血氣者莫不尊親道者其本也非道同志一
莫窺其奧故曰苟不固聰明聖智達天德者其孰能
知之蓋至誠之道非至聖不能知至聖之德非至誠
不能為故其言之序相因如此

潛雖伏矣節

君子內省不疚無惡於志君子所不可及者其惟人所不見乎言慎獨也

拾遺

莫見乎隱節

人所不睹可謂隱矣而心獨知之不亦見乎人所不聞可謂微矣而心獨聞之不亦顯乎知莫見乎隱莫顯乎微而不能慎獨是自欺也其離道遠矣

天下國家可均也節

其斯以為舜則絕學無為矣

君子依乎中庸節

遯世不見知而不悔者疑慮不萌於心確乎其不可拔也非離人而立於獨者不足以與此若不遠復者未免於有念也

君子之道費而隱章

唯費也則良知良能所自出故夫婦之愚不肖可以與知而能行焉唯隱也則非有思者所可知非有為

者所可能故聖人有所不知不能焉蓋聖人者德之成而業之大也過此以往則神矣無方也不可無體也不可能此七聖皆迷之地也孝經曰事父孝故事天明事母孝故事地察蓋事父母之心雖夫婦之愚不肖亦與有焉及其至也天地明察神明彰矣則雖聖人之德又何以加此此中庸所以為至矣

道不遠人三節

夫道一以貫之無物我之間既曰忠恕則已違道矣

然忠以盡已則將以至忘已也恕以盡物則將以至忘物也則善為道者莫近焉故雖違而不遠矣

鬼神之爲德章

道無不在鬼神具道之妙用也其德固不盛歟夫欲知鬼神之德者反求諸其心而已神將來舍則是神之格思也若正心以度之則乖矣所謂不可度思也正心度之猶不可又况得而忘之乎所謂不可射思也不可度故視不見聽不聞不可射故如在其上如

在其左右也夫微之顯如此以其誠之不可揜也誠則物物皆彰矣故不可揜微之顯者其理也誠之不可揜以其德言也

凡爲天下國家有九經曰修身也節

經者其道有常而不可易其序有條而不可紊

自誠明謂之性章

自誠明由中出也故可名於性自明誠自外入也故可名於教誠者因性故無不明明者致曲故能有誠

至誠之道可以前知章

至誠之道精一無間心合於氣氣合於神無聲無臭而天地之間物莫得以遁其形矣不既神矣乎

誠者非自成已而已也節

大學自誠意正心至治國平天下只一理此中庸所謂合外內之道也

至誠無息至生物不測節

至誠無息天行健也若文王之德之純是也未能無

息而不息者君子之自強也若顏子之三月不違仁是也其為物不貳天地之得一也一則不已故覆載萬物雕刻衆形而莫知其端也故生物不測

尊德性節

尊其德性而道問學人德也致廣大而盡精微地德也極高明而道中庸天德也自人而天則上達矣溫故而知新所以博學而詳說之也敦厚以崇禮所以守約而處中也

衣錦尚絅章

無藏於中無交於物泊然純素獨與神明居此淡也
然因性而已故曰不厭無聲無臭則離人而立於
獨矣不失足於人不失色於人不失口於人此簡
也然循理而已故文欲治其國先齊其家知遠之
近也人人親其親長其長而天下平可不謂近矣乎
欲齊其家先修其身知風之自也易於家人曰風自
火出而君子以言有物行有恒不可謂所自乎欲修

其身先正其心知微之顯也夫道視之不見聽之不聞而常不離心術日用之間可不謂顯矣乎所謂德者非甚高而難知也甚遠而難至也舉之則是故曰德輶如毛既以有所舉矣則必思而得勉而中是人道而有對故曰毛猶有倫若夫誠之至則無思無為從容中道是天道也故曰上天之載無聲無臭至矣

補刊章節
嗣考

在天成象則鳥與火虛與昴四時迭見者天道之變也
在地成形則作而長斂而藏四時異形者地道之變
也至於成象者莫測其進退之機成形者莫見其生
成之迹則天地之化也體化而裁之則無駭於變矣
此變化之辯也

聖人稽古之道不過三王而師古之道上及五帝若通
其變使民不倦神而化之使民宜之雖百世聖人不
能易也

立天之道曰陰與陽立地之道曰柔與剛立人之道曰
仁與義夫道一而已矣其立於天下則有兩端故君
子有剛克焉執其義之端也有柔克焉執其仁之端
也執其兩端而用之以時中此九德所以有常而三
德所以用義也

孟子雜解

人皆有不忍人之心章

惻者心之感於物也隱者心之痛於中也物之體傷

於彼而吾之心感應於此仁之體顯矣故君子之於禽獸見其生不忍見其死見其全不忍見其傷而況於民乎況於親戚乎故惻隱之心莫隆於親而民次之孟子曰君子親親而仁民仁民而愛物此自然之序也彼愛無差等者失其本心也已又曰惻隱痛傷也傷在彼而我傷之痛在彼而我痛之傷痛非自外至也因心則然此惻隱所以為仁之端也至於充其心體之本然則萬物一體矣無物我之間也故

天下歸仁焉

燕人畔章

象之惡已著而其志不過富貴而已故舜得以是而
全之若管叔之惡則未著而其志其才皆非象比也
周公詎忍逆探其兄之惡而棄之耶周公愛兄宜無
不盡者管叔之事聖人之不幸也舜誠信而喜象周
公誠信而任管叔此天理人倫之至其用心一也
規矩方員之至也章

愛敬盡於事親則孝之性盡矣盡之云者愛敬之道於是至矣不可以有加焉舜盡事親之道而瞽瞍底豫天下之為父子者定其理正如此也孟子言聖人倫之至也人倫至於聖人而後為至者蓋非盡性不能也學者之於人倫亦期於盡而已矣

居下位而不獲於上章

欲誠其意先致其知故不明乎善不誠乎身矣學至於誠身安往而不致其極哉以內則順乎親以外則

信乎友以上則可以得君以下則可以得民此舜之
允塞所以五典克從也然有誠者有誠之者不勉而
中無為也不思而得無思也從容乎中道是聖人之
事也故為天道至於擇善則有思矣固執之則有為
矣拳拳乎中道是賢人之事也故為入之道聖賢雖
異稟其為誠身一也

詩云娶妻如之何章

告而娶義之小者也廢人之大倫罪之大者也瞽瞍

之頑告則不得娶舜知之宜審矣故受不告之名而不忍陷父於廢大倫之罪如必先告俟其不從然後違之則是重拂其親之意而反彰其惡也故其不告君子以為猶告

盡其心者章

盡其心則心地無餘蘊而性之本體見矣知其性則廣大悉備天理全而人偽泯矣夫是之謂極高明存其心者閑邪以存其誠也養其性者守靜以復其本

也欲不外馳忿不內作反聽內視以歸有極則存其
心之道也其志致一其氣致專至大至剛以直則養
其性之道也存養至此則與天地相似而不違矣故
足以事天夫是之謂道中庸極高明者理極於知天
也道中庸者德全於事天也知天者造其理也事天
者履其事也徒造其理而不履其事是為知君上之
為我尊而未嘗致恭也知父母之為我親而未嘗致
養也其忠孝安在哉知天智之盡也事天仁之至也

仁之至智之盡也則死生為晝夜矣豈殀壽所能惑其心哉亦曰修身以俟之自作元命而已

形色天性也章

形者性之質也能盡其性則踐其形而無愧矣蓋萬物皆備於我則其所有何物不備反身而誠樂莫大焉為其能盡性而踐形也若反身未至於誠則是於性有所不盡未能盡性則於質有所不充矣故曰惟聖人然後可以踐形箕子曰視曰明聽曰聰視謂之

明聽謂之聰皆耳目之本然也能盡視聽之性則能盡耳目之形苟視聽不足於聰明則有耳目之形而無視聽之實德也豈不歉於形哉揚子曰聖人耳不順乎非口不隸乎不善若非禮勿視非禮勿言則於口耳猶有所擇是未足以言踐形

仁也者人也章

仁者以道之在人者名之也立人之道則仁之名所以立合而言之則仁與人泯矣此其所以為道也

游廬山集卷一

欽定四庫全書

游廬山集卷二

宋 游酢 撰

易說

象曰大哉乾元節

乾曰大哉坤曰至哉大則无所不包至則无所不盡
乾之大无方而坤則未離乎方也

終日乾乾節

終日乾乾反復於道也反復宜與復卦之反復同釋
終日乾乾行事之時而曰反復道何也蓋君子之行
事雖汲汲皇皇而易簡之理未嘗離也亦行其所无
事而已九三在下體之上將離人而天矣故有反復
道之象若夫聖人作而萬物覩則天德之所為確乎
能其事而已矣雖有為而未嘗為反復不容言矣

君子體仁節

道者天也道為萬物之奧故足以統天仁者人也仁

為衆善之首故足以長人猶之萬物發育乎春而震
為長子也大為之制經為三百曲為之防詳為三千
要皆歸於大中而已故曰嘉會足以合禮猶之萬物
相見於夏而離為文明也義主於刻制而利不生於
其間則不和先王之義勞之乃所以逸之故民至於
忘其勞殺之乃所以生之故民至於忘其死蓋利之
實行乎其中矣故曰利物足以和義猶之萬物彫悴
於秋而說言乎兌也事以智謀物以智創智而不貞

則事不立貞者正而固也謀之不正則異議得以屈
之守之不固則衆力得以傾之豈事之幹哉故曰貞
固足以幹事猶之萬物終藏於冬而成言乎艮也君
子行此四德則乾道在我矣故曰乾元亨利貞

初九曰潛龍勿用節

龍德而隱故不易乎世龍德而正中故曰善世而不
伐不易乎世者用舍在我故遯世无悶不成乎名者
非譽不在物故不見是而无悶確乎其不可拔則行

一不義殺一不辜而得天下不為矣非伯夷柳下惠之徒何足以與此若孔子則聖人之時不專於勿用也其易世之志未嘗一日而忘故曰天下有道丘不與易也

乾元用九節

揲蓍之法遇九六之數則變乾以純陽故陽極而亢坤以純陰故陰極而戰如其不變則亢而災戰而傷不能免也乾以用九則陽知險而變故元首而吉坤

以用六則陰知阻而變故永貞而利乾坤純乎陰陽者也故有用九用六與他卦不同將來者進成功者退天之則也故乾元用九乃見天則

君子學以聚之節

乾之道不盡於九二故有學問坤之道盛於六二故不習无不利

坤

坤者純陰之卦也故初六陰生有履霜之戒六四重

陰有天地閉之象

彖曰至哉坤元至應地无疆

乾曰大哉坤曰至哉大則无所不包至則无所不盡
乾之大元方而坤則未離乎方也坤順承天則於乾
之道亦无餘矣特不出於天之外而已故曰至哉坤
元言地道於是為盡也天下之道至於易而盡故曰
易其至矣天下之德至於中庸而盡故曰中庸其至
矣體易而崇德則日新體易而廣業則富有故曰盛

德大業至矣哉 其靜也翕故曰含弘含言无所不
容弘言無所不有其動也闢故曰光大光言无所不
顯大言无所不被四者坤元之德也體坤德以有行
者非君子不足以與此故曰君子攸行 天行健者
天之不已也元不覆幬者天之无疆而地之持載足
以配之故曰德合元疆盖元疆者以形言也德合元
疆者地之配天也應地无疆者君子之法地也知君
子攸行應地无疆則知乃順承天之下德合元疆者

合乎天也

六二直方大節

坤之六二靜則為中正動則為直方坤之道盛於六二而直方因動而後見也不言直方則地道之光不可得而見矣故以動者言之

天地變化草木蕃節

蓋言順也言順於勢也蓋言謹也言順於命也坤至柔而動也剛至靜而德方則用順亦必有所處如齊

之田氏魯之三桓晉之六卿其勢之馴致必至於不可解夫胡可以用順耶此初六之堅冰所以明用順之弊也天地閉賢人隱則伏其身而弗見閉其言而不出藏其智而不發唯恐其不謹如鄉隣有鬪者被髮纓冠而往救之則非所以為謹矣此六四之括囊所以明用順之善也夫順何尤哉順性命之理而已苟順性命之理安往而不善

君子黃中節

美在其中而暢於四支發於事業則周公其人也故
曰公孫碩膚赤舄几几公之大美發於事業者既遜
而不處其暢於四支者晬然見於動容周旋皆盛德
神明之容不可得而形容也徒見其赤舄几几而已
赤舄几几四體不言而喻也 黃中通理者養德性
之源而通至理也正位居體者正為臣之位而居坤
體也通理云者非謂其見彼也自見而已非謂其聞
彼也自聞而已故宅於心者至虛而明居體云者處

靜而无倡也稟其令而已處順而无作也續其終而
已故守其身者至柔而恭内外交相養則美其中粹
然无疵矣故見於面盎於背施於四體四體不言而喻
此暢於四支所以為美之至也致天下之大利成天
下之大順功高而朝不忌任重而上不疑此發於事
業所以為美之至也古之人有體是道者吾於周公
見之矣周公既有大美而不居則所得而形容者
道德之氣神明之容而已故曰赤舄几几盖暢於四

支者然也東人欲其留西人欲其歸而名實孚於上
下不可掩也故曰德音不瑕蓋發於事業者然也公
之碩膚若是而不與有焉則其為美之至可知也坤
之六二地遠於君諸侯之位也故言敬以直內義以
方外而以其動者言之所以為大也六五地近於君
公卿之位也故言黃中通理正位居體而以其靜者
言之所以為美也為臣之美於是兩盡

象曰屯節

屯宜建侯而不寧何也蓋屯難未解方且急賢才以自助故分土錫圭以報有功而崇有德又且與之戮力以弘濟艱難故雖建侯而不寧也若豫之建侯則四方无虞五刑不用要當建諸侯以藩屏王室而已以是建侯則寧矣武王歸馬放牛何不寧之有

初九盤桓節

夫建侯王者事也而於初九言之者以剛動而不失其正其自任以天下之重蓋王佐才也象所謂君子

以經綸者非初九其誰耶故其體國致君宜以協濟為意其曰利建侯者乃代天理物之職也

象曰蒙山下有險至聖功也

含德之厚比於赤子抱一不離此蒙以養正之謂也夫唯抱一不離故智雖滿天地而不自慮能雖窮海內而不自為付百職於衆賢而我无為焉其致功也吾不尸其事其成功也吾不處其名此聖人之功也筮者占以決疑也占以決疑无不致誠故易以決

疑以謀俱以筮言之非假布策也蒙之初筮者致一
以有求比之原筮者再思以有擇若夫假爾泰筮則
不可以有原也

象曰山下出泉節

山下出泉其一未散其勢未達觀其勢之未達則果
行觀其一之未散則育德

初六發蒙節

蒙之初六發蒙而利用刑人何也蓋民之迷則目无

所見耳无所聞若以物蒙其首也今欲發其蒙而示之以好惡則彼且不見利不勸不威不懲誥令所不能加行義所不能率必欲以利誘之耶則爵无德而禄无功愈非所以勸也故當小懲而大戒罰一以警百然後蒙者畏刑之將至相與從上之所好而避其所惡故其蒙可得而發也雖然有發蒙之志則刑人而為利矣苟惡其蒙而刑之不幾於不教而誅乎故曰利用刑人以正法也正法云者示之以好惡之謂

也

上九擊蒙節

蒙之上九擊蒙若齊之伐燕利其土地重器所謂為
寇也若葛伯仇餉而湯往征之所謂禦寇也

象曰雲上于天節

雲上于天則澤將下流天下之所徯望也故有需之象
飲食人之大欲存焉而人非飲食不生則天下之所
需莫急於飲食故需飲食之象而位乎天位以應天

下之求亦曰需于酒食而已然幅員之衆烏得人而飲食之哉亦曰養賢以及萬民而已故君子飲食燕樂者大烹以養聖賢使忠臣嘉賓得盡其心焉耳忠臣嘉賓盡其心則小民不失職而人人厭所欲矣九五之所需孰大於此

六三食舊德節

訟之六三才不稱位故有食舊德之象食舊德者世其祿也世之構訟者皆出於忿慾而六三才不足則

內省而无忮位已高則知足而无求夫如是則從上而已奚其訟故食舊德而安也然當訟之時才不稱其位則人必媚嫉之者故不能无危要之在已者貞固自守而无爭心故雖危而終吉也

九五訟元吉節

訟元吉謂聽訟之主也非身有訟也九五得尊位大中以正決天下之訟已則何訟之有當訟之時至而以中正決之是以元吉也若虞芮質厥成文王灋厥

生則聽訟之道孰善於此吉孰大焉故卦言利見大人大人則九五之謂也且訟而有孚猶室而後通惕而後寧中焉則吉終焉則凶自无元吉之理

師貞丈人吉節

師貞丈人吉故詩稱方叔元老克壯其猶也老者成德之稱乞其言足以愈人之疾故曰艾憲其行足以助人之善故曰叟其更事多其作謀審其成德也尊其致道也遠盖朝廷典刑所賴而非特可以行師也

丈人者老者之尊稱而法度所資也師之道以律為主故以丈人言之

彖曰師衆也至又何咎矣

用師之道將以正天下之不正也故師謂之征已不正其能正人乎此師之所以主乎貞也剛中而應任將之道也行險而順興師之義也仰順乎天元遠天以干時俯順乎人无咎人以從欲興師之順如此則民之從之雖犯難而忘死矣故能以衆正以衆正之

則人皆知其欲正已而已天下孰不趨於正哉其為
王也孰禦故吉且无咎

六二比之自內至不自失也

比之自內者非枉已以外求也上之人訪逮幽側至
誠以相與然後出而應之故爻稱自內而象以為不
自失也六二居中得正與九五為正應迹遠而志同
位殊而德合故以自內言之若伊尹之在莘而湯聘
加焉非自內以比耶尹負鼎干湯孰謂聖人乃不知

比之自失乎

象曰風行天上節

風行天上柔巽之上行也君子觀象於此則美其文德也天以剛健故其事武地以柔順故其事文風之柔无所不入地類也故有文德之象舜之格有苗文德之懿也詩稱仲山甫柔嘉維則令儀令色則所以畜宣王者文德而已矣故有明哲保身之說異乎伊尹之於成湯太甲也

上九既雨既處至有所疑也

以臣畜君至於和且至則畜道成矣猶當尚德以載之不可以賢臨之也尚德者无所不用德也故象以為德積載何則君臣夫婦人合也人合者易以睽故雖貞而厲若恃此以行而不止則陰疑於陽月盈而逼矣故雖君子之道猶為凶也所謂有疑者陰疑於陽之謂也

象曰履柔履剛也至光明也

卦之才則以一柔進退履衆剛故有履虎尾之象然而不咥人亨者說而應乎乾故也蓋說而已不應乎乾則不敬應乎乾而已非說則不和夫敬以和何事不行君子之所履苟在於是則雖暴人之前无虞矣雖蠻貊之邦行矣況於華夏乎故履虎尾不咥人而又亨也君子之所履未嘗不在於禮而禮勝則離今至於履虎尾而亨則其他可知矣此履之善也此合一卦之才言之若就一爻之義則六三蹈虎尾而凶

矣故爻象異辭猶之彖言剛中正履帝位而不疚而
九五言夬履貞厲也 剛中正履帝位而不疚者兌
澤下流故也膏澤下於民則貴為天子富有四海而
內省不疚矣此天下所以心悅而誠服也天下心悅
而誠服則親之若父母仰之若日月敬之如神明畏
之如雷霆可不謂光明也乎若其據利勢之重阻法
度之威以臨蒞天下而澤不加於民則民咨胥怨疾
首蹙頞而相告矣夫如是則從之者勢也而心背之

事之者貌也而腹非之夫何光明之有

象曰上天下澤節

天高地下禮制行矣人之所履禮而已故上天下澤有履之象君子觀象於此則可以辨上下上下既辨則名分立而民志定矣此以成卦之體言之也禮者所以辨上下而定民志也盖上下之分嚴則豐者不為有餘殺者不為不足而民志定此先王因人性以制之而理之不可易也其或強有力者竊其非分

而有之欲自以為榮是播其惡適足以發笑而自點
爾所有者非其分既不足以為榮而身陷不義更足
以為辱愚孰甚焉此臧文仲居蔡所以為不智也季氏
以八佾舞三家以雍徹正類於此而臧文仲當時名
大夫必嘗以智稱故仲尼以為何如其智以明其大
者不知其他不足稱也如以為先王之為禮將以籠
天下之愚而拘之則荀卿化性起偽之說行矣譬如
今人未仕而服青紫人必以為病狂文仲之愚不幸

類此

初九素履往至獨行願也

中庸言君子素其位而行不願乎外盖位有貴賤得喪而君子不因其位而改其素也履之初言素履亦猶是也素之為言无飾也大行不加窮居不損豈借美於外哉孟子所謂不願人之膏粱文繡者是也履此而往則志之所祈嚮者非有徇乎人也獨行其平昔之志而已故曰獨行願也在履之初未交於物故

有素之象

六三眇能視至志剛也

六三以一陰獨立於羣陽之中而又處非其位故有眇跛之象猶之陰而无匹也眇能視跛能履明不足而行不全也故有武人之象若用此以蹈危其能无傷乎惟武人用此以聽命於大君則處陽而志剛可以有為矣大君剛中正而履帝位者也明足以照理行足以率人故武人聽命而有為可以无虞而有功

矣

上九視履考祥節

視所履之善惡所以考失得之報蓋禍福之來必象其德而還之也在履之上為履道之成在我者无非禮矣故其旋元吉其旋者象其履以還之之謂也

象曰天地交泰節

財成天地之道猶言變理陰陽也輔相天地之宜猶言寅亮天地也寅亮者事功之所及如義和之職是

也此體天地交泰之事也至於燮理則非體道之全而與天地相流通者不足以與此此體天地交泰之道也財者節其過也猶言範圍成者補其虧也猶言彌綸範之使有常則日月无薄蝕陵谷无遷易四時常若風雨常均若此者範之者也圍之使无踰則春无凄風秋无苦雨冬无愆陽夏无伏陰若此者圍之者也彌之使不虧其體則覆幬者統元氣持載者統元形陽敷而能生陰肅而能成夫是之謂彌綸之使无失

其叙則日月代明寒暑迭運將來者進成功者退夫
是之謂綸

彖曰否之匪人節

比之匪人言所比非其人也否之匪人言致否之因
也君臣上下在朝者非其人則將引天下之叻憤姦
回萃於朝此所以致否也羣小在上而衆邪逞故不
利君子貞當是時非有大人之德則處否而未必亨
非有大人之才則不足以休否伊尹五就桀而當時

羣小不能害焉非體道忘我孰足以與此以顏子之
賢遊於人間世仲尼猶以心齋告之則為君子類者
處否之時正當全身遠害而已有國家之道君臣而
已傳曰不有君子其能國乎蓋惟君子在朝然後君
臣各得其道上下合志而天下之情通此國之所以
立也如君不君臣不臣則天下无邦矣猶之父不父
子不子則无家矣无邦者其道亡也

六二包承至不亂羣也

否之六二下乘初六上承六三二陰皆小人之象二
不包初則小人蓄忿而陷我矣不承三則小人依勢
而藉我矣故曰包承小人吉此言君子之居中守正
者全身遠害當如是也若夫至中至正之大人則不
然體道虛己以遊人間或不言而飲人以和與人並
立而使人化蓋嘗入獸不亂羣矣況於人羣乎故能
處否而亨也若伊尹五就桀而羣凶不能以害之是
也揚子以不離其羣為聖人蓋知不亂羣之說也

六三包羞節

六三在下體之上位寔顯矣而當否之世不能去又以陰柔處之是可羞也世之寡廉鮮耻苟賤之士處顯位以播惡於衆而不自知其醜者多矣六三與中正剛明者為鄰則見聞所漸亦知其可羞矣惟以資質陰柔不能行其所知至於忍恥而冒處故謂之包羞九三伏戎於莽節

伏戎於莽欲以九五之下接也升其高陵欲以扞二

之上比也二五以同德合而九三居剛不中不務德而欲以力爭宜其三歲不興也三在下體之上有高陵之象故曰升其高陵其者指三之本體也

九四匪其彭節

舒王以匪其彭為其旁不知所據何說且近君之位有下比之嫌怨非獨大有之時為然伊川以彭為衆多似于大有為親一說彭有張大之意當大有之勢居近君之位輒據而矜之志于張大則羣賢解體天

地鬼神亦且弗祐矣此昧者所以敗也辨哲明之著也

六五厥孚交如節

大有之成體文明而剛健之主故能以至誠與下而下亦以至誠應之上下合德而无間故曰厥孚交如為大有之主高拱尊位其明不可欺其健不可陵則人之畏之將如神明矣故曰威如吉彼且推赤心置人腹中其胸中坦然无疑忌誰肯用數以御下哉此

太平之君子所以易而无備也

上九自天祐之吉節

六五有至信之德而上履之故有履信之義五為大君而上九與衆陽同體而應之故有思乎順之義上九為明之極而自處无位之地推衆陽而進之故有尚賢之義能如是則无天災物累无人非鬼責天人交助之宜其吉无不利也自天云者理之必至非有求而得也伊尹將告歸旁求俊乂啓迪後人自不居

其成功盖用此道也又以尚賢者體信順以處已而
又以尚賢也

彖曰蠱剛上而柔下至天行也

飭蠱以有事者不可以有擾故於蠱以先甲後甲言
之甲者仁柔也發號施令者不可以徇人故於巽以先
庚後庚言之庚者義剛也傳曰通變之謂事事往來
終始如循環必至之理也故曰天行君子察於此故
先事而豫以弭於未然故能致治於未亂非知幾不

足以與此後此而圖以防其將然故能轉凶而為吉
非知化不足以與此三日者成數也原始要終亦推
其數而已先後至於成數則无虞矣 巽而止者飭
天下之蠱義主於巽而道貴於止也巽而止則元亨
而天下治矣故諸爻皆以家道言之盖當是時治大
宜如小治衆宜如寡治煩宜如簡一切以柔巽自處
而无意於動衆順其序而弗擾因其情而无咎如子
之任父事則觀聽不駭而害已消矣因便而為之甚

易也如欲以發強剛毅勇於作為多所紛更者任是猶治絲而棼之益以壞亂而已非治蠱之道也初六幹父之蠱至意承考也

初六才不足以應宜不足以幹蠱而能考无咎者以柔巽為體而意專於承考也意承考者子道之正也故爻稱為有子況夫一家之事固不煩而初亦未廣也持吾承考之意以從事則何事而不濟耶書曰罔曰弗克維既厥心意在于承考斯能盡其心矣人心

金剛經疏 卷二
其神矣乎能盡其心則雖愚必明雖柔必強才之不足非所患也

九二幹母之蠱至得中道也

九二處多譽之地才有餘而道不失中固衆譽之所歸六五因衆譽而用之則人情莫不悅服彼其才足以任劇而以中道承柔中之君則其君且仰成而繼志述事有餘地矣然譽在下而上不思者得中道而承以德也

九二咸臨吉至未順命也

君倡而臣和禮之正也若臨之九二以剛中之才任
六五之眷倚則有從道不從君之事矣故象以為未
順命至於為上為德而君臣一道則上之所倡豈終
不和耶故以未順言之咸臨吉无不利者二與五
以同德相與至誠以相應而无私意也其順之實固
已見於未命之前矣故曰未順命也猶言未占有孚
也

六四至臨无咎至位當也

臨之六四為至臨者應下而順上守之以正以臨其民則民敬而從之是其為臨也可名為至矣然多懼之地而才不足以有為非若六五知臨之大也故稱无咎而不言吉適當其位而已

彖曰大觀在上至天下服矣

聖人久於其道而天下化成蓋天下之化非有資於號令之鼓舞也刑賞之懲勸也一於誠而已誠至則

天下後其志而從之如恐不及矣故曰盥而不薦有孚顒若先王之化民豈能拂其所有而與之以所无哉亦曰順以巽而已中正民之性也順其性而入之則將淪肌膚而浹骨髓矣下觀而化自然之理也

六三觀我生節

六三觀我生進退者省諸已也度德以就位量能以任官也九五觀我生者驗諸民也所以審好惡而察治忽也夫如是則興事造業无過舉矣故无咎此在

上位者與德稱而志在民者之所為也故特稱君子以別六三也若夫上九之觀其生則觀其時之施設也此有君子之才而无其位身在畎畝而志常在君者之所為故亦稱君子而象因其有觀以知其志未平也

象曰山附于地節

山附于地則山頽之象山至于頽則以下不厚而上危故也

彖曰復亨剛反至天地之心乎

復其見天地之心乎天地之心主於生物復之時未
有物而物以陽復而生博愛者聖人之心也復禮未
有愛也而博愛之實由復禮而出故序卦曰復則不
妄无妄者天命也先王以此茂對時育萬物則於博
施濟衆也何有

六二不耕獲至未富也

无妄之六二不耕而獲不菑而畲以明君子之於物

也應而不倡其於事也述而不作非樂通物也樂循
理而已矣循理而已則有行有為皆天命也何妄之
有焉雖然六二得位矣而非尊位故其勢不得以始
事得中矣而非大中故其才不足以創物是故象以
為未富若夫通其變使民不倦神而化之使民宜之
應時而造以敏成功其為无妄孰大於此

大畜利貞節

說者以大畜為君畜臣夫賢者易祿而難畜而盛德

之士盖有君不得而臣者恐无畜大賢之理如以為
所畜者非盛德之彥則不足以當所尚之賢而非所
謂止健也且攬羣材而並用之故重道輕祿者不足
以自高宜莫如堯舜而童牛之牯殯豕之牙徒取于
私欲不行豈聖君之盛德曾何健之止乎又以不家
食為聖人能養賢以及萬民不待家食而民被其養
矣然自古養萬民者藉令不知為政亦无家食之理
况大畜尚賢之卦也其畜道之成亦曰何天之衢亨

金匱要略卷二
未及言養民也恐不須主此義

彖曰大畜剛健至應乎天也

柔得位而上下應之小者之畜也古之人有行之者
若仲山甫之於宣王是也故詩人稱之曰柔嘉維則
又曰衮職有闕惟仲山甫補之剛上而五承之能止
健大者之畜也古之人有行之者若伊尹之於太甲
是也故高宗稱之曰先正保衡作我先王則補衮之
闕不足道也夫人主之勢固能制利害而擅生殺矣

可不謂健已乎非有大人之正德終始惟一者孰能止之昔之辯士盖有能變亂名實而使其君虛已以聽之至於踈間親新間舊言聽計從无不遂其意者其術智亦足以畜其君矣而君子惡之為其不正耳此大畜所以言其利貞也大人在上則天下利見而野无遺賢矣羣賢畢進則涖天職而食於朝此所謂不家食也羣臣不家食則禮義立而政事修財用足而百志成萬邦咸寧吉孰大焉亦何難之不濟乎故

曰利涉大川當是時命有德討有罪无容心焉天理而已矣故曰應乎天也

初九有厲節

且賢者之畜君亦必有道焉量而後入信而後諫不量而入則將至於失身未信而諫則君必以為諂已故初則有厲而利已

九二輿說輶至无尤也

二則輿說輶二得中矣有剛中之德有載上之才猶

有待而後行非不欲行也道合則從不可則去此中
无尤之道也

九三良馬逐利艱貞節

九二輿說輶至於三位高而近君矣故良馬逐然世
治不輕進國有道不變塞焉故利艱貞猶且日戒曰
閑吾衛以防其逸力厚而義不行才全而用有序上
非我應也而其德同已非上比也而其志合內之畜
於已者如此其周外之畜於君者如此其審則安往

而不利哉

六四童牛之牯節

九三良馬逐利艱貞夫然後禁於未發如六四故為童牛而加牯焉格其非心如六五故為犢豕之牙蓋六四純陰而勢順賢者以剛克止之則牯牛之象也六五犢豕節

六五柔質而處剛又當尊位質柔則嗜慾易以深處剛則躁競易以逞當大畜之時賢者以大中之道正

其大本則殲豕之象也禁於未發故能使之棄所習
捐所能而人斯與之矣故有喜格其非心則窒其原
矣非特禁未發而已也且幽王之惡大矣而當時大
夫欲化其心以畜萬邦則畜君之要正在於格其非
心而已故取象於殲豕而无嫌於六五也蓋豕之為
象其躁忿足以傷物而賊仁其嗜慾足以伐性而滅
義今而窒其原則貪欲之情可化為不求而義不可
勝用矣躁忿之質可化為不忤而仁不可勝用矣君

仁莫不仁君義莫不義則非特人與之而已天斯祐之矣故有慶

上九何天之衢至道大行也

畜道之成至於天人交助則賢路自我而四達矣故上九曰何天之衢亨賢路而謂之天衢言陟降之當於天心也彖曰剛上而尚賢則大畜之義主於上九也然崇俊良以列庶位而推轂賢路使天下无家食之賢者上九之任也故其爻以何天之衢為言天下

至於无家食之賢則道之大行孰盛於此此大畜所以為先王之盛時也

六二顛頤拂經于丘頤至行失類也

聖人推言頤之為道以為天地養萬物聖人養賢以及萬民則以上養下頤之正也若在上而反資養於下則於頤為倒置矣此二與四所以俱為顛頤也然二之志在物而四之志在道故曰顛頤而吉而二則征凶也何以知其然耶盖六二居中得正宜足以自

守矣然在下體踈遠而未有祿又動體也宜於處約
未能自安故降志以求初初方一意於應四而不答
也則又將求其類以趨五五非其應又力不足以自
養而何暇養人乎故二為行失類此以知其志之在
物也 夫自養以有所養養德以需天下之求頤之
常理也今至于屈已以求諸人則失理之常矣此二之
求于五五之資於上所以俱為拂經也

六四顛頤吉至上施光也

六二行失類至于六四則其志正矣其位近君矣官尊祿厚足以无求矣而汲汲於應初非好善忘勢又將與賢者共之不能為此若孟獻子之家有友五人焉者近是矣且嗜慾深者其天機淺而士大夫之志或涉于重外則人人得而易之矣今六四之所取重者在此而不在彼則瞻視尊嚴儼然人望而畏之故如虎視眈眈而所欲皆得也欲仁而得仁則无惡於欲矣誰能推咎之哉故四之顛頤乃為上施光此以

知其志之在道也

六五拂經居貞吉至順以從上也

六五履尊位而德不稱德雖不稱位而其富固无敵
矣所以不足者非物也乃能親上九之賢委已以聽
之亦庶乎有以養萬民矣而六二之有求方且養其
私而已此五之拂經所以異於二也雖然六五質柔
而止體也喜蹈常畏興事其資然也見善未必明用
心未必剛故以之守文以之持正可也若應變以成

務則非其任矣蓋疑問一生則危亂之機將不可解
故居正則吉而不可涉大川也 不可涉大川為六
五之君言之也利涉大川為上九之臣言之也使大
臣之才如上九足以養天下而人主順以從之其蔑
不濟矣此周公復政之後成王所以四征不庭制禮
作樂六服承德也

上九由頤厲吉節

六五居正則吉乃如上九之賢則頤之時所謂養賢

以及萬民者皆自我出匹夫匹婦无不與被其澤矣夫然故天下信之衆賢助之人主親見其功業而深知其所存徧知其所為任之必專小人莫得以間之天亦誘其衷矣故其迹雖厲而其理則吉此所以利涉大川而大有慶也夫以身殉國弘濟於艱難固大臣之職也詎肯臨危而顧其身哉惟欲善其後以冀成功則亦審其時而已矣若成王未知周公之時則不可涉大川六五是也若周公既見察於成王之後

則涉大川而利矣上九是也說者謂以上養下為顛
頤是以顛為正矣故用伊川說

象曰風自火出節

欲齊其家先修其身知風之自也易於家人曰風自
火出而君子以言有物行有恒可不謂所自乎

象曰損損下益上至與時偕行

損之三陽皆損已者也三陰皆受益者也損已者或
資諸物或取諸身資諸物者損上益下如初九是也

取諸身者損剛益柔若九二上九是也

初九已事遄往至尚合志也

損之初九曰已事遄往所謂事者損之事也言損初之實以益四之虛也未事而往則恭敬无實而人未享後事而緩往則於疾无損而事不濟四之志欲損其疾而初遄往使遄有喜焉故曰尚合志也然損下以益上者或失其節則後難繼故必酌損之

九二利貞征凶至中以為志也

兌之情說而陽之性好動故損之九二有利貞征凶
之戒蓋二既得中矣恐其銳於有為而失中或至于
畔道也由中出者損已與人而已愈多故曰弗損益
之而其益无方也

六三三人行至三則疑也

上之所任者在道故三得於上為得友友者以道言
也下之所任者在事故上得於三為得臣臣者以事
上言也三人行三陰之象也三陰雖同類而志不一

卷二
於上則於三反為累也故曰損一人蓋德二三故也
一人行則三與上為正應故曰得其友蓋德惟一故
也已之德二三能無疑乎莊子所謂汝何與人偕來
之衆者亦言用志之不一也

六四損其疾至亦可喜也

物之出有限故必酌損之而所益不過亦可喜而已
已則有疾初无可喜也因人以去之故曰亦可喜也
六五自上祐六四得其友而為上九忘家之臣豈徒

損其疾而已哉

上九弗損益之節

得臣无家謂三之致一也

六三益之至固有之也

益則吉矣而用凶事者所謂吉人凶其吉也三居下體之上當震動之極不用凶事則高而危滿而溢矣非固有之道也所謂凶事者必非衣帛冠布抑而損之行恭而用儉所以固有之也三本剛體而以柔居

卷二
之故有用凶事之象

象曰夬決也節

揚于王庭誦言于王也孚號誣告于下也告自邑自
近而及遠也夫去小人而播告之修若是其詳何也
蓋君子之夬也豈徒夬其人而已固將戮一以懲百
使天下皆知惡之不可為如四罪而天下服也然小
人之陰慝其慮身甚周其欲害君子之意甚切將欲
決之能无疑乎故初則不勝二則惕號三猶有凶也

雖然彼以其邪我以吾正彼以其凶我以吾仁又方
與羣剛協德盡道以去之其憂不濟乎故其危也乃
其所以為光也若夫九五則據利勢操主權其除惡
之易如薙菟陸甚易而无危矣然才高而性剛必期
於夬夬而後已雖未過中於道為未光也

姤女壯節

姤女壯巽為長女也女壯則乘陽其極將至于為剝
故勿用取女而初六有躅躅之戒也以其為巽體也

故為女壯以其陰之初生也故為羸豕

九五以杞包瓜至志不舍命也

以杞包瓜者以九二之剛中包初六之柔脆用賢得民之象也用賢得民則我无為也中心守至正而已故曰含章若是者天實臨之降之百祥將不旋踵矣故曰有隕自天蓋明君之於天下安危利害不惑其心居中守正強為善以俟之所以作元命也故曰志不舍命

九二井谷射鮒至无與也

井道以高潔為體以上出為功故初為井泥二為井
谷射鮒盖其自處汙下而功用熄矣然九二既得中
而有趨下之汙何也盖所居不正則用心不剛又巽
體也而上无應故甘心於趨下而不自振其德之地
不足稱也

上六井收勿幕節

井之上六則井既清矣无滌也既完矣无甃也既食

矣无求也井道之成无所事矣故曰井收收者集其
成功之謂也成則如之何亦博施濟衆而已故曰勿
幕

易與天地準節

彌之使不虧其體則覆幬者統元氣持載者統元形
陽敷而能生陰肅而能成夫是之謂彌綸之使无失
其叙則日月代明寒暑迭運將來者進成功者退夫
是之謂綸

範圍天地之化節

範之使有常則日月无薄食陵谷无遷易四時常若
風雨常均若此者範之者也圍之使无踰則春无凄
風秋无苦雨冬无愆陽夏无伏陰若此者圍之者也
或曰伊川序易曰隨時變易以從道然則易與道
為二乎曰神无方而易无體易者道之用也既已涉
於用矣且得无從乎惟其變易而不離於道斯可名
於无體矣若春作夏長秋歛冬藏皆神之所為也神

之所為異於人為者以其從道而已此四時之所以
不忒也老子曰道法自然亦即人所見以明道也先
生之意正欲使學易者知變易之必從道則用不詭
於易矣

子曰知變化之道節

春作夏長秋斂冬藏皆神之所為也神之所為異於
人為者以其從道而已此四時所以不忒也
是故夫象聖人有以見天下之賾至存乎德行

非思非慮非視非聽了然遺照而獨存者神而明之
之謂也神存而明之非有心之所能知也此道之所
以明无處无出无从无違確乎其能事者默而成之
之謂也性默而成之非有為之所能得也此道之所
以行



游廬山集卷二